

Pol da Tesalonaika Amīn do Papia 1 Mandagīt

But piso gen

Tesalonaika uñun Masadonia Provins dakon kokup madepni. Pol Pilipai yípmañ dekgit bisapmon Tesalonaika kokup madepmon kij pañmuwukbi uñun iyí pañalon agit (Yabekbi 17.1-9 uñudon koki). Mani Juda amīn da kañba miñat amīnyo morapmi da Pol dakon gen nandajek Yesu yolyol amīn dagawit, do nandaba yokwi tok añ imiñek Pol yolba Tesalonaika yípmañ kigit. Don pi ísalni Timoti yabekban kij Yesu yolyol amīn Tesalonaika egípgwit uñun niañ ekwañ uñun pindak nandañyo añek abiñ Pol iyigít.

Pol, Timoti da yo uñun noman tawit dakon geni iyigít bisapmon, Pol ae Sailas ae Timoti da Tesalonaika pañmuwukbi dakon nandañ gadatni pañteban ak do añek papia on mandawit. Nandak nandak amīn morapmi da on papia do Pol da papia morap díma mandajek on papia nañ mibiltoksi mandagít yan nandañ. On papiakon Pol da Tesalonaika pañmuwukbi dakon nandañ gadat gat ae añpakni tagisi do but galaksi nandisak.

Tesalonaika pañmuwukbi uñun Yesu kosit niañon da apjak uñun díma nandaba pisagit. Kristo díma tobil abiñakwan kili kimakgwit amīn uñun egíp egíp teban abidokdañ, bo díma? Ae Kristo ni bisapmonsi apjak? Yanđo, mibili nandak do nandañ. Pol da geni uñun dakon kobogi mandaj

yomïnek aŋpak tagisi aŋkimagek Amin Tagi da ap-jak bisap do jomjom ani do yoyigit.

*Pol gat pi isalni gat Tesalonaika amin do nand-abu kik awit
(Kilapmi 1-3)*

¹ Pol, Sailas, ae Timoti nin da paŋmuwukbi Tesalonaika kokup papmon ekwaŋ ji do papia on mandamaŋ. Ji Piŋkop Dat ae Amin Tagi Yesu Kristokon kili gadawit.

Piŋkop da nandaŋ yawok damiŋek butji paŋ ya-wot aban yawori tosak.

Polda Tesalonaika amin dakon nandaŋ gadat do but galaksi nandaŋgit

² Bisapmi bisapmi nin ji do nandaŋek Piŋkop ya yan iyamanj. Bisit amanjon ji kisi do nandaŋek amanj.

³ Nin ji dakon aŋpak do nandaŋek Piŋkop Dat ya yan iyamanj. Nido nandaŋ gadatji do aŋek aŋpak tagisi aŋ, ae amin do but dasi galak tan yomïnek pi tebaisi aŋ, ae tebaisi agek Amin Taginin Yesu Kristo ae tobil apdisak uŋjun do nandaŋ teban tanek jomjom aŋ.

⁴ Not kabı, Piŋkop da ji do but dasi galak tan damisak, ae ji iyı do manjigit yaŋsi nandamaŋ.

⁵ Nido Gen Bin Tagisi jikon aŋkigimaŋ uŋjun gen naŋ gin dima aŋkigimanj. Uŋjun tapmim gat ae Telagi Wup gat kisi da altan damgut. Ae nandaŋ gadatnin uŋjun tebaisi yan disi pindakgwit. Nin ji da binapmon egek ji paŋpulugok do pi agimanj uŋjun disi nandaŋ.

6 Piñkop dakon gen abidañakwa jigi morapmisi noman taŋ damgwit, mani nin gat ae Amin Tagi gat da jigi paŋek kisik kisik pagimanaŋ jiyo kisi uŋun anŋak yolakwa Telagi Wup da kisik kisik damgut.

7 Aŋpakji tagisi uŋun nandaŋ gadat miŋat aminyo morap Masadonia ae Akaia provinskon ekwaŋ do yolinjba pindakgwit.

8 Amin Tagi dakon gen yaŋ teŋteŋawit uŋun Masadonia ae Akaia provinskon ekwaŋ amin dagin dima nandawit, kokup dukwan dukwan kisi da ji da Piñkop do nandaŋ gadawit uŋun dakon geni nandawit, do nin da saŋbeŋek gen di yogogi mini.

9 Jikon opno nin tagisi timikgwit uŋun dakon geni uŋun miŋat aminyo da iyi yoŋ. Ji kokup kidat yopmaŋek but tobil aŋek Piñkop bamisi egip egip teban egisak uŋudon kiŋek oman amini dagawit dakon geni yoŋ.

10 Ae ji Monji Kwen Kokup da tobil pikdisak uŋun do jomjom aŋek ekwaŋ uŋun dakon geni kisi yoŋ. Monji uŋun kimakgit naŋ Piñkop da aeni aban pidagit. Uŋun Yesu da nin paŋkutnaŋban Piñkop dakon butjap madep noman tokdisak bisapmon dima yokwi toneŋ.

2

Pol iyı Tesalonaika kokup papmon pi agit do yosok

1 Not kabi, nin ji gat egipgumaŋ bisapmon pi agimanaŋ uŋun dima sun tagit, uŋun disi nandaŋ.

2 Nin jikon dima kiňek Pilipai kokupmon egipgumanj bísapmon aňpak yokwi mayak mayagi aň nimgwit, ae nindapba tepmi pagimanj, uňun disi nandań. Mani jikon opgumanj bísapmon Piňkopnin da nin paňteban aňakwan uwalnin yum píndagek jikon Gen Bini Tagisi yan teňteňagimanj.

3 Nin Yesu nandań gadań imni do yan damgumanj bísapmon, gen gulusuň kında dima dayigimanj, ae nandak nandak yokwi dí gat nandańek pi dima agimanj, ae ji dima paňkewalgimanj. Uňun diması.

4 Piňkop da butnin paňkılık nindańek iyı dakon galaktok yolek Gen Bin Tagisi yan teňteňonej dakon pi nimgut. Yanđo, miňat aminyo da nindaba pi tagisi aň yan nindani do dima amań. Piňkop nin dakon but píndat píndat amín uňun da nindaban tagisi amań uňun doğın nandańek amań.

5 Ji nandań, ae Piňkop kisi nandisak, nin da ji dima paňgalak agimanj, ae ji dakon yo kabı do píndak galaktok aňek gen tagi uňun dima dayigimanj.

6 Ji bo ae amín dí da man madep nimni yanđon da pi dima agimanj.

7 Asi, nin Kristo dakon yabekbini, do paňpulugonisi do tagi dayinom. Mani, nin ji da bikbigon egipgumanj bísapmon meň kında da monjini upmokdok uňun da tilak yaworisı egipgumanj.

8 Nin ji do but dasi galak tanj damgumanj, do Piňkop dakon Gen Bin Tagisi damgumanj. Ae uňun gin dima, notsi agimanj do aňek ji paňpulugok do

egip egipnин киши parekgimanj.

⁹ Not kabi, nin ji gat egek Piñkop dakon Gen Bin Tagisi yagimañ bisapmon nin yo nibañ nañ pañyo aneñ yan do pi tebaisi agimañ uñun disi nandañ. Nin dakon yiñit do jigi dima pani yan do gildari ae kalbi pi madepsi agimañ.

¹⁰ Kristo nandañ gadañ iman amin jikon anpak agimañ uñun disi nandañ, ae Piñkop yo kisi nandisak. Nin telagisi egek, anpak kilegisi anek, gwaljigí mini egipgumañ.

¹¹ Dat kinda da miñat monjiyonikon anpak asak, uñun da arípmón nin da jikon anpak yan gin agimañ, uñun disi nandañ.

¹² Nin ji dakon but panjeban anek but yokwi dima ani yan do dayin panjeban agimañ. Ae anpak Piñkop da pindakban tagisi an uñun bañ ani do morapmi dayigimañ. Piñkop da iyí dakon amín kila agak ae tilim kaganigwan egipni do yan damisak.

Pañmuwukbi da nandañ gadat bamisi anek jigikon tebai akgwit

¹³ Ae yo kinda gat kisi do nandañek bisapmi bisapmi Piñkop ya yan iyamañ. Yo uñun yan: Piñkop gen yanapno timikgwit bisapmon, amin dakon gen bañ timikgamañ yan dima nandawit. Piñkop iyí dakon gen bañ timikgamañ yanji nandawit. Gen damgumañ uñun asi Piñkop dakon gen. Uñun gen da nandañ gadat amin jikon pi tebaisi asak.

¹⁴ Not kabi, Judia miktimon Piñkop dakon pañmuwukbi morap Yesu Kristokon gadañbi da egi ajan kwañon, yo noman tan yomgwit, jikon

yan̄ gin noman tan̄ damgwit. Judia miktimon nandaŋ gadat amin Juda amin da jigi morapmi anjomgwit, yan̄ gin kokup ̄salji da jiyo jigi morapmi anjamgwit.

¹⁵ Juda amin da Am̄in Taḡ Yesu aŋakba k̄imakgit, ae kombi amin k̄isi dapba k̄imakgwit, ae nin nolba kigimaŋ. Piŋkop da anpak pindakban iŋjani aŋ uŋun anek amin morap k̄isi uwal aŋ yoman̄.

¹⁶ Amin Nwaknjwari Kabikon Piŋkop gen d̄ima yoyinen yan̄ do kosit sopsop ak do pi aŋ, nido Piŋkop da yokwikon ban̄ d̄ima t̄imitjak do nandaŋ. Yan̄ anek kalipgwan da yokwi sigin anek yokwini paŋmuwuk kakwaŋba madepsi aŋakwan apmeŋon Piŋkop dakon butjapni pabin̄ uŋun am̄inon tagit.

Pol da Tesalonaika amin aeni pindat do tagisi nandagit

¹⁷ Not kab̄i, nin bisap p̄isipmi ji depman̄ degek dat kinda da miŋat monj̄yoni yopmanek dubagikon eḡisak uŋun dakon tilak eḡipguman̄. Nin ji d̄ima dandagiman̄, mani butninon da ji gat eḡipguman̄. Do aenin tobil k̄in̄ ji dandak do pi madepsi agiman̄. Nin ji dandakdosi nandaman̄.

¹⁸ Nin jikon kik do nandagiman̄. Nak Pol da jikon kosiri morapmi kik do pini agim, mani Sunduk da kosit sopman̄ nimgut.

¹⁹ Am̄in Taginin Yesu aeni apjak bisapmon yo nido nandaŋek iŋamnikon tebai agek kisik kisik aneŋ? Ae pi agiman̄ dakon bam̄i yo ninaŋ yolin̄ pi tagisi awit yan̄ nindasak? Nin ji do kisik kisik aneŋ.

20 Asi, nin ji do nandanjek butnin tagisi asak, ae kisik kisik amanj.

3

Pol da Timoti Tesalonaika amin panjeban asak do yabekgit

1 Nin ji dandak do tepmisi nandagimañ, do gen yanj anjteban aŋek nit Atens kokupmon egek

2 Timoti yabetdo jikon opgut. Timoti notnin uŋun Piŋkop dakon oman amin, uŋun Kristo dakon Gen Bin Tagisi yanj tenjetenosok. Ji panjeban aŋek nandan gadatji paŋpulugosak do yabekgimak.

3 Jigi tepmiyo uŋun da noman taŋ daba di da nandan gadatji dima yipmañ detni yanj do yabekgimak. Disi nandan, jigi ae tepmiyo uŋuden paneŋ do Piŋkop da kili nandagit.

4 Nin ji gat sigin egipgumanj bisapmon jigi morapmi pakdamañ yanj dayigimañ. Disi pakyansi nandan, yo dayigimañ uŋun kili noman tawit.

5 Mibili yanj do nak ji do nandaba kik aŋek Timoti yabekgo ji dakon nandan gadat pindat do opgut. Paŋkewal Amiñ da ji paŋkewalban maŋakwa pi agimañ uŋun isali asak yanj do pasalgim.

Timoti gen tagisi kinda aŋapban Pol kisik kisik agit

6 Timoti jikon da ninon tobil abiŋek gen tagisi kili niyik. Ji da nandan gadat tebai aŋek amin do but dasi galak taŋ yomañ uŋun do niyik. Ae bisapmi bisapmi nin do nandanjek tagisi nandan yanj yosok.

Nin ji dandakdosi nandamanj, yan gin jiyo kisi nin nindakdosi nandaŋ yanjo kisi niyik.

⁷ Not kab̄i, nin jigi ae tepmiyo paŋek ji da nandaŋ gadat tebai aŋ uŋun dakon geni nandaŋek uŋun da butnin paŋteban asak.

⁸ Am̄in Tagikon gadaŋek tebai akganj yan nandamaŋ, do nin egip egip bam̄isi ekwamanj.

⁹ Nin ji do nandaŋek Piŋkopnин da iŋamon kisik kisik madepsi aŋek Piŋkop ya yan iyino aripmi dima asak.

¹⁰ Gildari ae kalbi Piŋkop da nipban abiŋ ji dan- daŋek nandaŋ gadatji da tetgiŋ yo nido wadaŋ uŋun damneŋ do bisit madepsi aŋek ekwamanj.

Pol Tesalonaika am̄in kīŋ pindat do bisit agit

¹¹ Piŋkop Datnin gat ae Am̄in Taginin Yesu gat da kosit yipmaŋ nimaŋakwan jikon opneŋ kaŋ tagisi yan nandamanj.

¹² Am̄in Tagi da ji paŋtagap aban ji kabikon ae am̄in morap kisikon but dasi galak taŋ yomyom aŋpak uŋun madepsi paptan ireŋ tosak do nandamaŋ. Nin da ji do madepsi but dasi galak taŋ damamaŋ uŋun da tilagon ani dosi nandamaŋ.

¹³ Yaŋ aŋakwa Am̄in Taginin Yesu Kristo da butji paŋteban aŋakwan iyı dakon miŋat am̄in kabini morap gat apjak bisapmon ji telagisi ae gwaljigi minisi Piŋkop Datnin da iŋamon atni dosi nandisat.

Tesalonaika am̄in aŋpak tagisi an k̄imotni

(Kilapmi 4-5)

4

Yumabi dima ani

¹ Not kabi, mibi do yan dayisat. Añpak morap Piñkop da pindakban tagisi aŋ uŋun anidosi nin da kili doligimanj, ji uŋun banj yolek aŋ. Mani abisok Amin Tagi Yesu da manon uŋun aŋpak sigin sanbejek madepsi aŋ kimotnisi do dayin panjeteban amanj.

² Amin Tagi Yesu da yan mudan niban nawa gen dayigimanj uŋun disi nandanj.

³ Piñkop da ji telagisi egek yumabi aŋpak mibili mibili dima ani do nandisak.

⁴ Giptimji dakon galaktok yokwi dima yolni do kila tagisi aŋek telagisi egek amin bamisi da tilagon egipni.

⁵ Galak tok yokwisi gat, ae nandak nandak yokwisi gat da ilik paŋkwa Piñkop dima nandanj imanj amin da yumabi aŋ uŋudeŋ di abam.

⁶ Ji paŋmuwukbi wili notji paŋkewalek yumabi aŋpak uŋuden miŋatni gat dima ani. Amin Tagi da aŋpak uŋuden aŋ amin yo yokwisi aŋyomdisak. Nin uŋun dakon nawa gen tebaisi kili dayigimanj.

⁷ Piñkop da yumabi aŋpak mibili mibili aneŋ do dima yan nimgut. Telagisi egipneŋ do yan nimgut.

⁸ Yaŋdo, gen on abiŋ yipmaŋdak amin uŋun amin dakon gen naŋ dima abiŋ yipmaŋdak. Uŋun Piñkop, Telagi Wupni damisak, uŋun dakon gen naŋ abiŋ yipmaŋdak.

Aŋpak tagisi aŋ kimagapno teban tosak

9 Pañmuwukbi notji do but dasi galak tañ yomiñ yomiñ ani uñun do gen dí díma mandagi nandisat, nido Piñkop da iyí uñun do kili dayin̄ dekgit.

10 Ji asi pañmuwukbi notji Masadonia provinskon dukwan dukwan ekwañ uñun do but dasi galak tañ yomañ. Mani, uñun aŋpak sigin̄ saŋbeŋek madepsi aŋakwa pap tosak dosi dayamañ.

11 Ji yawori egek disi da egip egipmon yo morap agagi uñun dogin̄ nandaŋek amin díwari da egip egip niañ aŋ uñun dakon geni ban̄ yanek díma egipni. Kalip dayigimañ uñun da arípmón ji kisitji da pi aŋek uñun ban̄ egip egipji dakon kila ani.

12 Yaŋ aŋek kaŋdo amin da kísiron díma egipni. Aŋakwa pañmuwukbikon díma saŋbeŋbi amin da aŋpakji píndagek nandaba wukwan damni.

Amin Tagi da abij nin pañmuwutdisak

13 Not kabi, amin kili kimakgwit kabíkon yo ni da noman tokdañ uñun ji da pakyaŋsi nandani do nandamañ. Piñkop díma nandaŋ gadaŋ iman̄ amin da kimakbi arípmi díma pídoni yaŋ nandaŋek bupmí madepsi nandaŋ uñudeŋ di abam.

14 Yesu kimakgit da aeni pídagit yaŋsi nandaŋ gadamañ. Yaŋ agit do nin yaŋsi nandamañ, Piñkop da amin Yesu nandaŋ gadaŋ imin̄ek kili kimakgwit amin uñun Yesu gat tímíkban apdañ.

15 Amín Tagi iyí dakon gen dayamañ uñun yaŋ: Amín Tagi tobil apjak bisapmon nin kalugi ekwamañ amin da amin kimakbi mibíl tañ yomiñek díma kikdamañ.

16 Amin Tagi iyı Kwen Kokup da piñek yan
tidanek gen teban kinda yosak. Aŋakwan aŋelo
mibiltogi da gen yanjakwan Piñkop dakon kwen
yosak. Aŋakwan Kristo nandan gadaŋ iŋiŋek
kimakgwit amin da kalip pidokdan.

17 Uŋun bisapmon miŋat aminyo kalugi sigin
egipneŋ amin nin wigeño uŋun amin gat gikwemon
muwugek kwen binap Amin Tagi gat domdom
akdaman. Aŋek Amin Tagi gat bisap dagok dagogi
mini egı wigekdamaŋ.

18 Ji notji paŋteban ak do gen on notji yoyin yoyin
ani.

5

Nin si tagap taŋek egapno Amin Tagi apjak

1 Not kabı, uŋun yo morap ni bisapmon, bo ae
ni gildaron noman tokdaŋ uŋun do dima mandagi
nandisat.

2 Nido disi nandan, Amın Tagi apjak dakon gildat
uŋun kabو noknok da kalbi but pisoni mini aban
uŋun da tilak but pisoni mini apdisak.

3 Amın da yan yokdaŋ, “Yaworisi ekwaman, ae
yo di da nin arıpmi dima paŋupbal ani.” Yan
yanjakwa uŋudon gin miŋat da monji paŋalak do
but pisoni mini monji sugarjakwa tepmi paŋ uŋun
da tilak tepmisi tasık tokdaŋ, ae arıpmi dimasi
pulugaŋ kikdaŋ.

4 Mani not kabı, ji pilin tukgwan dima ekwaŋ, do
uŋun gildat kabо noknok da yan noman taŋ daban
dima wiripdatdaŋ.

5 Ji kisisi teñteñi ae gildat dakon amin. Nin kalbi ae pilin tuk dakon amin dima.

6 Yañdo, amin diwari da dipmin pak ekwanj uñun da tilak dima egipneñ. Kalugi egek nin do kila tagisi anek egipneñ.

7 Dipmin pokgoñ amin uñun kalbi pokgoñ, ae pakbi teban nañek but upbal añ amin uñun kalbi añ.

8 Mani nin gildat dakon amin, do nin nin do kila tagisi anek egipneñ. Nandañ gadat gat, ae amin do but dasi galak tañ yomyom añpak bañ pibit kutnoknin do paneñ. Ae Piñkop da yokwikon bañ wagil timitdisak yañ nandañ teban tañek jomjom aman uñun da busuñ kutnoknin asak.

9 Piñkop da butjapni paneñ do dima manjigít. Amin Taginin Yesu Kristo da pi agit do anek nin yokwikon bañ timitjak do manjigít.

10 Yesu nin do anek kimakgit. Sigin egapno apjak bo kimagapno apjak uñun iyi gat egipdaman gin, mibili yañ do anek kimakgit.

11 Yañdo, ji abisok añ, yañ gin notji pañpulugañek butni pañteban añ an ani.

Piñkop da pañmuwukbi pañpulugañban añpak tagisi bañ timitni

12 Not kabi, ji kila aminji gawak yomni. Uñun amin ji dakon wukwisi egek ji da binapmon pi tebai anek nawa gen dayan. Amin Tagi da uñun amin kila aminji egipni do pañalon añ yopgut.

13 Pi madepsi añ uñun do nandañek nandaba wukwan yomiñek but dasi galak tañ yomni. Ae not kabisi gat but kalon anek yawori egipni.

14 Not kabi, aŋpak ani dosi nandamaŋ uŋjun yaŋ: kurak tok amín pi ani do tebai yoyini, ae yo tagi díma aneŋ yaŋ nandaŋ amín butni paŋteban ani, ae tapmímní mīni amin paŋpulugoni. Amín kisi do but yaworon da kulabik ani do bikkik yomni.

15 Amín da yokwi arjaba kaŋ, tamoni do kobogi yokwi díma aŋyomni. Bisapmí bisapmí disikon ae amín kisikon aŋpak tagisi aŋyom do pi tebaisi ani.

16 Bisapmí bisapmí kísik kísik aŋek egipni.

17 Bisit yipmaŋ deri mīni aŋek egipni.

18 Yo niaŋen dí noman taŋ daba kaŋ, ji Piŋkop ya yaŋ iyini, nido Piŋkop da Yesu Kristokon gadawit amín ji aŋpak yaŋ ani do nandisak.

19 Telagi Wup da butjikon yo kínda ani do kíndap da yaŋ soŋban kaŋ díma abi kimotjak.

20 Ae amín kínda da kombi gen dayik do aban kaŋ díma kurak taŋ imni.

21 Mani gen morap gat ae aŋpak morap gat kokwin tagisi ani. Aŋek yo tagisi baŋ tímigek

22 yo yokwi morap paŋpekwalni.

23 Piŋkop but yawot nimisak uŋjun da ji paŋtagap aban egip egipji kisi parek iminiek telagisi egipni dosi nandamaŋ. Yaŋ aŋek wupji ae butji ae giptimji dakon kila aŋakwan diwarisi mīni egakwa Amín Taginin Yesu Kristo tobil apjak.

24 Piŋkop ji yaŋ damgut uŋjun da jikon pi aban uŋjun yo morap noman tokdaŋ, nido Piŋkop gen yosok uŋjun dimasi yapmaŋdak.

25 Not kabi, Piŋkop da nin paŋpulugosak do bisit ani.

26 Pañmuwukbi notji gat domdom ani bisapmon but dasi timitni.

27 Amin Tagi da manon da tebai yan dayisat, on papia pañmuwukbi kabı kisikon manjinj yomni.

28 Amin Taginin Yesu Kristo dakon nandaŋ yawotni jikon tosak do bisit aman.

**PINKOP GEN
The New Testament and Psalms in the Yopno Language
of Papua New Guinea
Nupela Testamen na Buk Song long tokples Yopno long
Niugini**

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 28 Dec 2024 from source files
dated 31 Aug 2023

b683ce50-d820-5bfc-8471-d8ee080be106